



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

ბუჩურაშენი

ბუჩურაშენი, ბუჩურიანი, განვითარებული შუა საუკ. ქართული ხუროთმოძღვრების ძეგლი, მიკვლევულ იქნა 1964 ბოლნისის რ-ნში დაბა კაბრეთის ჩრდ.-აღმ-ით 3-4 კმ-ზე, ძვ. ნასოფლარის ბუჩუკუნის მახლობლად. დაანგრიეს მადნეულის სამთო-გამამდიდრებელი კომბინატის მშენებლობის დროს (1970). სწორკუთხააფსიდიანი პატარა (3,2 X 2,2 მ) დარბაზული ეკლესია ნაგები იყო ნატეხი ქვით. იგი საყურადღებოა როგორც თავისი გეგმით, ისე ადრინდ. ქრისტიანული ხანის ქვის რელიეფებით, რ-თა ნაწილი ჩაშენებული იყო მის კედლებში, ნაწილი მის მახლობლად ეყარა. გათხრების შედეგად აღმოჩნდა, რომ ეკლესიის მიწისზედა ნაწილი ამოყვანილი იყო თლილი კვადრებით ნაგებ ძვ. ნანგრევებზე. როგორც ირკვევა, ამ ადგილზე იდგა ადრინდ. ქრისტიანული ხანის ეკლესია, რ-ის ნაშთიც არის აქ აღმოჩენილი. სტელებისა და ბაზების ფრაგმენტები, ქვის ძეგლები თავისი ფორმით, შემკულობის თემატიკითა და მოტივებით, აგრეთვე შესრულების ტექნიკით უახლოვდება ბოლნისის სიონისა და იმ დროის სხვა ცნობილი ძეგლების რელიეფებს, რაც მისი V-VI სს-ით დათარიღების საშუალებას იძლევა. ბ-ის ეკლესიაში აღმოჩნდა სტელის ბაზისი ბერძნ. რელიეფური წარწერით. საიდანაც ირკვევა, რომ სტელა ალუმართავთ სიმეონსა და ავლიანეს თავიანთი ოჯახების სალოცავად, ხოლო თეოდორე ყოფილა ამ საქმის შემსრულებელი ოსტატი. წარწერა თარიღდება VII-IX სს-ით (დაცულია ს. ჯანაშიას სახ. საქართვე. სახელმწ. მუზეუმში).

ლიტ.: ყ ა უ ხ რ ი შ ვ ი ლ ი თ., კაბრეთის ბერძნული წარწერა, «ს. ჯანაშიას სახ. საქართველოს სახელმწ. მუზეუმის მოამბე», 1967, ტ. 27B; ჯ ა ფ ა რ ი ძ ე ვ., ჩვენი ისტორიის ერთი მემკვიდრე, «ძეგლის მეგობარი», 1975, № 39.

დ. ბერძენიშვილი

